

META DI E ASOCIACION ARUBANO DI CONSUL



ORANJESTAD (AAN): Manera DIARIO a trece dilanti caba, riba Diaranzon 21 di februari na oficina di notario mr. Faride E.E. Tjon Ajong na Oranjestad a pasa e acta di e statutonnan di Asociacion Arubano di Consul. Na e ocasion aki tabata presente e fundadornan y alaves e miembronan di e prome directiva di e Asociacion Arubano di Consul: Consul di Mexico, sr. Eric D'Arnault (president), Consul di Portugal, sr. drs. Jose Fernandes Perna (vice - president), Consul di Costa Rica, sra. Cecilia Arendsz Flores (secretario) y Consul di Jamaica, sr. Daniel Wilson (tesorero).

Despues di a firma e Statutonnan di e Asociacion, miembronan di Directiva a haci nan prome presentacion oficial cerca Su Excelencia mr. O. Koolman, Gobernador di Aruba y cerca Su Excelencia mr. J.H.A. Eman, Prome Ministro di Aruba.

INAUGURACION DI E ASOCIACION: Diahuebs 22 di februari durante un reunion extra-ordinario pa tur Consul isntala na Aruba, lo inaugura e statutonnan na e presentenan. E acto ceremonial aki lo tuma lugar den sala di reunion di e departamento di Relacionnan Exterior den J.E. Irausquinplein 2 A pa 5'or di atardi. Durante e encuentro aki tambe lo tin oportunidad pa inscribi como miembro di e Asociacion. Un gran mayoria di Consulnan ya a duna di conoce cu nan lo inscribi como miembro; te hasta algun Consul cu no tin

residencia na Aruba, pero cu si tin jurisprudencia pa territorio di Aruba tambe a duna di conoce cu nan kier ta miembro di e Asociacion Arubano di Consul.

OBJECTIVONAN DI E ASOCIACION: Artículo 3 di e Statutonnan di e Asociacion Arubano di Consul ta describi e siguiente objectivonan:

- a) Stimula, conserva, desaroya y mantene e dignidad, e debennan, derechonan y privilegianan ehecutivo pa cu e profesion di Consul, conforme cu e leynan y custumbennan internacional;
- b) Protehe y salvaguardia e interesnan di cada miembro di e Asociacion den relacion cu Gobierno y demas autoridad civil;
- c) Comunica saludonan oficial na ocasion di celebracionnan, como tambe comparti duele na momentonan di incidente, tragedia y desastrenan nacional, na e respectivo Gobiernonan;
- d) Conmemora dianan internacional cu ta promove fraternidad, justicia y igualdad na mundo;
- e) Promove e interes profesional y e status profesional di cada miembronan di e Asociacion y estrecha contacto, harmonia y colegialidad bao tur e miembronan;
- f) Atende cu e interesnan consulario di e respectivo paisnan representa na Aruba di e sentido mas amplio di palabra.

TRABAONAN DI PREPARACION: Riba 5 di Juli 2000 a tuma un encuentro



entre algun Consul y algun funcionario di departamento di Relacionnan Exterior (Aruba). Meta principal di e encuentro aki tabata pa sondea e posibilidadnan pa lanta un Asociacion Arubano di Consul. Ta asina cu den pasado na dos ocasion a purba di lanta un Asociacion, pero esaki no a logra. Den e encuentro di 5 di Juli a keda instala un asina yama Grupo

Piloto, consistiendo di e Consul di Portugal, Mexico, Costa Rica y Francia; di parti di departamento di Relacion-

nan Exterior a participa sr. drs. H. Baarh, sra. drs. E. Williams.

Despues di algun encuentro interno (Juli - Augustus

2000), Grupo Piloto a presenta su mes na e otro Consulnan y a informa nan di nan iniciativa pa bin cu un Asociacion Arubano di Consul (September - October 2000). Den e periodo di November 2000 pa Februari 2001, Grupo Piloto a sigui traha riba e recomendacionnan ricibi y awe, 21 di februari 2001, e Asociacion Arubano di Consul a bira un realidad. Den e reunion di inauguracion riba 22 di februari 2001 lo propone y puntra na e presentenan encunto e prome actividadnan di e Asociacion entre otro: bishitanan di trabao na e respectivo departamentonan di Gobierno y demas autoridadnan civil pa sera conoci cu e objetivonan di e Asociacion Arubano di Consul